

21/06/2002

Pemerhati luar puji ucapan dasar Presiden

PEMERHATI dari luar negara yang menghadiri Perhimpunan Agung Umno berpendapat ucapan Presiden Umno, Datuk Seri Dr Mahathir Mohamad menyentuh semua aspek penting kehidupan orang Melayu.

Duta Indonesia, Hadi Wayarabi Alhadar, berkata pandangan Perdana Menteri supaya orang Melayu yang juga beragama Islam tampil sebagai satu bangsa yang menjadi tuan rumah di negara sendiri sangat tepat.

Katanya, pandangan yang diutarakan boleh dijadikan asas perbandingan kerajaan Indonesia dalam usaha memajukan masyarakat pribuminya, terutama orang Melayu.

"Orang Melayu atau majoriti rakyat Indonesia adalah beragama Islam harus berjuang memperbaiki nasib sendiri.

"Saya percaya rakyat Malaysia patut berbangga dengan usaha Dr Mahathir dan Umno," katanya.

Beliau mengulas ucapan dasar Dr Mahathir bertema "Mendedah Yang Terbuka" pada Perhimpunan Agung Umno.

Hadi juga bersetuju pendirian Dr Mahathir yang mengatakan umat Islam fundamentalis adalah mereka yang mengamalkan ajaran Islam sebenarnya dan bukan golongan sederhana.

Naib Presiden Bharatiya Janata Party India, V Rama Rao, berkata perhimpunan Umno adalah medan perbincangan orang Melayu untuk terus menjadi bangsa dan negara yang maju.

Sebagai pemerhati, katanya, beliau tertarik pandangan Dr Mahathir bahawa keganasan tidak ada kena mengena dengan agama, sebaliknya berlaku di mana-mana negara oleh sesiapa saja.

"Tidak ada pengaruh agama dalam keganasan kerana agama menganjurkan keamanan dan kebaikan," katanya yang pertama kali ke negara ini sebagai pemerhati Perhimpunan Agung Umno.

Sebanyak 21 parti politik dari 18 negara menghantar wakil masing-masing.

Presiden Pertubuhan Kebangsaan Melayu Singapura, Borhan Ariffin, berkata beliau kagum dengan sikap terbuka Dr Mahathir ketika memberi nasihat serta menegur pelbagai kelemahan yang masih dihadapi oleh orang Melayu di Malaysia.

Beliau berkata, penekanan Dr Mahathir terhadap kemajuan ekonomi dan semangat bersatu padu di kalangan orang Melayu jika mahu maju dan menghadapi globalisasi harus diberi perhatian.

(END)